

HUBENTUD DEN MOVECION

Pa Mercedes Abdul...

Alumno di klas 3 di La Salle College a keda impresiona cu charla di Poëta Ruthy Vrieswijk



Luna di Maart ta nos luna cultural cu celebracion di nos Dia Nacional, y relaciona cu esaki, alumnonan di klas 3 MAVO di La Salle College, bao guia di Juffrouw Rita Williams, docente di Ingles, a invita e poeta Arubiano sra. Ruthy Vrieswijk- Bergen, pa tene un charla tocante poema, con el a cuminsa skirbi y kico esaki ta nifica pe, con e desaroyonan a bay te cu awor.

Seccion Hubentud den Movecion tin entendi cu ta henter e school ta celebra nos luna cultural en grandi, cu diferente tema cu ta trata, entre otro, nos Idioma Papiamentu of nos hendenan Arubiano cu ta skirbi.

DUNA DI BO CURAZON: Henter e klas a scucha cu hopi atencion y por a admira e disconan compacto di "Lady Ruth", scucha algun poema y algun di nan mes a recita algun poesia na Ingles, for di e coleccion di Ruthy. Nan a hacie na un manera espontaneo pero cu firmeza, ya cu esaki ta un actividad cu a tuma lugar durante les di Ingles.

Como parti di su

preparacion, sra. Vrieswijk a haye ta coba den su cashinan pa a acumula algun material mas di "tempo di su tempo", algun revista, potret, pa muestra con el a cuminsa por ehemplo como Maestra di Ceremonia, papiando pa prome biaha den un publico hopi grandi den Stadion, na su 16 aña di edad, apenas un aña despues cu el a gradua pa su MAVO 4, y a cuminsa su prome trabao na Radio Kelkboom den Emmanstraat e tempo ey, mientras cu e tabata atendiendo Avond Havo.

El a splica con el a cuminsa skirbi su prome poema. El a comparti cu e alumnonan aki di curazon, pa por inspira nan pa tambe expresa nan mes riba papel, ora nan ta sinti nan mes pa bay un tiki mas leu den nan pensamiento y sentimentonan profundo. Señora Vrieswijk tambe a encurasha e alumnonan pa atende e diferente cursonan, por ehemplo di "public speaking" di Aruba Female Jaycees, seminario y charlanan di Quota Club, ya cu hopi di e curso y charlanan aki, a engrandece su conocimiento riba varios

tereno.

SEMBRA PA TIN BON COSECHA:

Señora Vrieswijk a conta e alumnonan algun di su anecdotan di tempo cu e tabata un teenager, mesun edad cu nan. El a dorna e lesenaar di Juffrouw Rita cu un tafellaken cora, riba dje a pone un beer, un tiger y un aguila, splicando kico e simbolonan aki ta nifica pa su persona, relaciona cu skirbimento y bida den su totalidad.

El a splica nan cu e color cora ta amor, pero tambe peligro. Sra. Vrieswijk a bisa nan pa ta nan mes, no sconde tras di pañanan di marca y explora nan talento, nan donnan cu cada un tin. Pa duna algo na comunidad ora nan por, por ehemplo na nos grandinan. Ruthy a sinti hopi cariño pa e muchanan aki y den hopi di nan a wak su mes atrobe sinta den klas.

El a sinti su mes masha honra cu e invitacion pa a tene e charla aki, y e ta gradici specialmente Juffrouw Rita Williams y tambe su klas cu a comporta asina nechi y cu a pone atencion. E ta kere cu



aki, tambe algun simia positivo a worde planta, y cu bendicion di Dios lo por disfruta di e frutanan, aki

algun tempo. Riba potret por aprecia e bunita mainta aki na La Salle College MAVO-3.

